

Сеферова Ф.А.

**ЧЕРКЕЗ-АЛИНИНЪ ЭСЕРЛЕРИНДЕ АХЛЯКЪИЙ ИДЕАЛНЫНЪ ИНКИШАФЫ
(XX АСЫРНЫНЪ 70–80-НДЖИ ЙЫЛЛАРЫ)
ЭВОЛЮЦИЯ НРАВСТВЕННОГО ИДЕАЛА В ТВОРЧЕСТВЕ КРЫМСКОТАТАРСКОГО
ПИСАТЕЛЯ ЧЕРКЕЗ-АЛИ**

Предлагаемый вниманию материал посвящен проблеме эволюции нравственного идеала в творчестве Черкез-Али. Традиционные, испокон веков ценимые женщинами ценности: семья, работа, любовь, под пером у Черкез-Али обретают особое звучание. Воплощением нравственного эстетического и гражданского идеала в романе «Сабалар къучагында» («В объятиях зари») является человек труда, борец за мир.

Макъсат: Черкез-Алининъ «Сабалар къучагында» романынынъ ахлякъий-эстетик къыйметини къосьтермек.

Малюм ки, эдебиятта яратылган эр бир эсер белли бир дедержеде дегерли ола бильмез. Амма эр бири озь заманында девирге менсюп меселелери чезмеге буюк хызмет эте. Эшреф Шемьи-заденинъ: «Земане языджы озь девринен адым атмакъ, озь деврининъ севиесинде он ашагы олмамакъ керек», – деген сёзлерининъ догърулыгыны, келишклигини Черкез Алининъ «Сабалар къучагында» ве «Джумертлик» романлары мисалинде корьмек мумкюн [1]. Етмишинджи сенелери койлюернинъ алты, федакар эмеклери акъкъында чокътан-чокъ эсерлер яратылган. Бу мевзу узеринде чокъ языджылар ишлеген. Амма Черкез-Алининъ иджады башкъаларыны текрарламай. Эльбетте, бу девир языджыларынынъ эсерлери мевзу зенгинлигинен айрылып туралар. Бу, девлетнинъ маддий ве маневий байлыкъларыны яратыджи – совет адамларыны, партия ве укюметни, ана-Ватанны, интернациональ достлукъны шеревлеген эсерлердир. «Эсерлернинъ чокъусы инкишаф этмекте олган социализм джемиетининъ талапларына джевап бермектен аджиз эдилер» [2].

Лякин несиллер багыны сечип алмакъ ве кечмишини окъуйыджынынъ юрегине якъынлаштырмакъ, синьдирмек факъат марифетли языджынынъ къолундан келе. «Сабалар къучагында» эсерининъ яратылмасына, эльбетте, халкъымызнынъ башына тюшкен буюк фаджиа – 1944 сенесининъ сюрюнлиги себепчи олды. Кыркынджи-эллинджи сенелери халкънен бирликте Черкез-Али де бу фаджианы башындан кечирди. Чыдалмаз мешакъатларга огъраган, эр бир тарафтан хырпаланган ве акъаретленген кырымтатар халкъы эллинджи сенелери партия ве укюметнинъ къарарына бинаэн Урал дагъларында орман кесе, Къазахстан чёллеринде бол берекет ичюн куреше, Мырзачёльни, Къаракъум ве Къызылкъум чёллерини абаданлаштыра, озь заметинен шуретнинъ энъ юксек дедержесине котериле ве ерли халкънынъ итибарыны къазана. Романда къар астында комюлип къалган тереклер, эмекчилернинъ беджерикли къолларынен асралган тютюн, дженк йыллары ве дженктен сонъ халкънынъ башына тюшкен фелякетлер ве, ниает, янъы бахтлы аятнынъ тантанасы усталыкънен тасвирлене.

«Озюнде къоюлган меселелер ве ахлякъий-эстетик къыймети джеэтинден роман бизим бугуньки куньлеримизге-сексенинджи йылларнынъ адамларына догърултылган ве айны вакъытта тарихий къарамане кечмишимизден узюльмеген», – дей филология илимлери намзети Джаид Азизов [3, с.124].

«Инсанлар арасында инсан олып юрмек яхшымы, ёкъса инсан сыфатыны ташыган йыртыджи олып юрмек яхшымы? Инсан баласы омюрининъ сонъуна къадар юзюнинъ астарыны джоймамакъ борджлу», – дей Черкез-Алининъ къараманларындан бири. Мутемадиен деньишип турган бу тутарлы дюньяда мезкюр суаль ве фикир аля даа актуаллер [4, с.70].

Роман бир бакъышта алтмышынджи-етмишинджи сенелеринде совет эдебиятында кениш даркъалган «истисал» романларыны текрарлаган киби. Адетиндже, «истисал» романларда мевджут олганы киби, муэллиф бу девирге хас олган джемиеттеки кескин зыддиетлерден четлей ве социализмнынъ гъалибана адымларыны, сербест эмекнинъ шадлыгыны тереннюм эте. Орман кесювининъ кетишаты, тютюн сачув, техника тамири, инсаннынъ табий афатнен куреши, шубесиз, Къазахстаннынъ кошесинде ерлешкен Едисай вадийсининъ энъ муим проблемалары. Лякин бу «ач-такъыр чёлни чечекленген бир диярга» чевирген, бу «къум ве къар боранлары укюм сюрген, аятсыз бир дюньяны» эмекчилернинъ къоллары, тёккен манълай терлери «гуль багъчага, тылсымлы диярга» чевирдилер. Демек, романда «истисалнен», эмекнен ян-янаша аджайип ишчи, койлю ве муневер адамлар да бар.

Хышымлы сюрюнлик бораны эвсиз-баркъсыз къалган, ач-зелиль кырымтатар халкъынынъ бир кысымыны Алсаба коюне савурды. Мында «кунеш тёпеньден урса, табанындан чыкъа...» Аятсыз бир дюнья... Языджи ашыкъмадан, имкяны олдукъча мукъайтлыкънен кырымтатар халкъынынъ тарихындаки фаджиалы саифелерге токъуна. Сюрюнликнинъ себеплери акъкъында сёз къачырмай, лякин зекаветли окъуйыджынынъ козьлери огюнде мезкюр девирнинъ мутхиш левхалары асыл олалар. Фашист баскъындыларына къаршы олюм-къалым дженки бутюн совет халкъына унутылмаз белялар кетирди. Дженк мейданларында миллионларнен адамлар эляк олды. Къара хаберлер, «беллисиз гъайып олды» мектюплери нетиджесинде миллионларнен къадын-къызларнынъ гонъюллерини къара фереджелер ортти. Лякин бутюн бу фелякетлер кырымтатар халкъынынъ башына айрыджа даа да дешетлидже тюшти. «Татарларны Къырымдан сюрюн этюв – оларны ашкярсызлыкънен ольдюрюв. Совет акиметининъ кырымтатарларга нисбетен макъсады – бу оларны къоранталарынен тамамиле гъайып этмек. Татарлар

миллет сифатында ич бир вакыт оньалмасынлар». «Немселерни Сталинграддан кьувган сонь, Русиенинь шималинде бизлер ичюн бараклар кьурулган эди. Озюмиз де, балаларымыз да гьайып оладжакьмыз. Совет акимieti макьсадына иришмек ичюн чешит ёллар кьыдырып тапар», - кьайд этиле НКВД-нынъ №4848, октябрь 1944 сенедде язылган муим весикьада [5].

Улу Ватан дженки... 1945 сенеси, Гьалебе байрамындан сонь, кьырымтатар дженкчилерини эждатларындан кьалган мукаддес топракь ерине, акьаретли гетто беклей эди. Миллий кьараманларымызны укюмет «юксек мукафатнен» рагьбетледи. Бойле дженкни олар Улу Ватан дженки деп танырлармы? Шунунъ ичюн бу дженк кьырымтатар халкьы ичюн Ватан дженки дегиль де, акьикьатта, экинджи джиан дженкидир.

«Тарихымыздаки «акь тамгьалар» халкьнынъ юрегине кьара тамгьа олып батмакьта. Эр шейни озь адынен адландырмакь, эр шейни олгьаны киби косьтермек вакьты кельди» деген сёзлер, афсус ки пек кеч, гьайрыдан кьурув девринде янгьгырадылар [6, с.5].

Дженк янгьгыны Черкез-Алининъ кьараманларынынъ такьдирлеринде савушмагьан яра изи кьалдырды. Янгьгызыкьта кьалган Мурадасыл, Макьпуле, Самедин Арсланов, Айрие ве башкьаларынынъ образлары гьает тесирли тасвирленген.

Балатон голно янында яраланган, Берлингедже дженк эткен, догьрулыкьны севген, «адам пашасы» – Мурадасыл. Гьалебеден сонь о бир йыл шахтада чалыша, сонь Казахстангьа ёлланма ала. Бу – «ташны сыкьса сувуны чыкьараджакь, арслан киби адам» Казахстан дагьларында эджельсиз оле. «Тирнекли, кемалатлы ве беджерикли» Макьпуле Ашыралиеванынъ образы буюк усталыкьнен акс эттириле. Онынъ такьдири, кучьлю ирадеси окьуйыджыны айретте кьалдыра! Бабасы дженк башлангьаны киби Брест кьалеси этрафларында, анасы бомба патлагьанда эляк олалар. Макьпуле кьардашларына эм аналыкь, эм бабалыкь япа. Омюр аркьадашы дженкте эляк ола. Ойле корюне ки, яш кьадыннынъ башына бутюн белялар, агьырылыкьлар эшилди.

Лякин муёллиф мезкюр бахытсызыкьларнен сыньырланмай. Заваллы Макьпулени «Мурадасыл ичюн кьальбинде туткьан булжор киби темиз севгисинден» марум эте: «Йыкьылган терек догьрудан-догьру Мурадасылнынъ устюне тюше» [4, с.116]. Акьибетте Макьпуленинъ севгилиси дагьда гьайып ола. «Мераметли, намуслы, иште ве мунасебетте халкькьа садыкь» Макьпуле бахтыны элял хызметте тапа. Шуну кьайд этмек керек ки, Черкез-Али эм «Сабалар кьучагьында», эм де «Джумертлик» романларында кьадын-кьызларымызнынъ даяныкьлыгыны образлы суретте саксаулнен тенъештире: «Саксаул не кьадар чыдамлы осюмлик экен. О, язнынъ атешли кунешине, кьышнынъ аджджы сувугьына, кьум боранына – табиатнынъ не кьадар хышымы олса, эписине даяна. О атештен башкьа ич бир шейден кьоркьмай» [4, с.19].

Ходжасы Алиман Шахардиннинъ ахлякьсыз аркетлери нетиджесинде Айриенинъ аилеси бозула. «Алиман мени кьадын оларакь бегенген, амма адам оларакь урмет этмеген. Урметсиз севги – темельсиз бинагьа ошай», - дей о [4, с.83]. Бу, терен дуйгьулы, алдав, вефасызлыкьтан нефретленген яш кьадын озюни кьолгьа ала, бахтыны тапа, намуслы эмегинен койлюлернинъ севги ве урметини кьазана. «Инсан озь бахтыны озю тапа ве озю таптай, Айрие. Мен сенинъ кьальбининъ темизлигине, намусынъа, инсаниетлигинъе бакьып кьыймет кестим», - дей Айриенинъ якьын досту, сырдашы Макьпуле [4, с.56].

Асылында, эсерде эр бир вакьиа Айрие ве Макьпуленинъ образлары этрафында асыл ола. Роман отуз алты бабдан ибарет. Олардан эр бири Айрие я да Макьпуленинъ аятындан сечип алынган бир вакьиа. Оларнынъ эписи бир мундеридже ёлагьына тизилип, муёллифке халкь кьальбининъ зенгилигини, адий эмекчилернинъ ахлякьий дюньяларынынъ юджелигини тасвирлемеге имкян догьуралар. «Черкез-Али озь кьараманларынынъ ички дюньясыны, оларнынъ ичтимай – ахлякьий ве психологик мунасебетлерини эм мустакьиль ве эм де бири-бирине багьлы суретте инкишаф эттире» [7, с.125].

Дженктен эвель Кьырымда тютюнджилик совхозында агроном вазифесинде чалышкьан Самедин Арсланов ичюн алидженаплыкь, садыкьлыкь, мераметлик ахлякьий пишкиндикнинъ энъ зарур хасиетлери: «Инсан олып яшаган сонь, юрегинъде мерамет олмалы. Мераметсиз олып дюньяда яшамакь мумкюн дегиль. Мерамет олмаса адамлар бири-бирине кьашкьыр киби бакьар эдилер», - дей о [4, с.149].

Фин кампаниясынынъ иштиракчиси, экинджи джиан дженкини Сербияда екюнлей. Озь танкьнен Москвада Гьалебе парадында иштирак эте. Бу, «юреги мермер таш киби кьавий ве темиз» инсан Айриенен берабер баш багьлап, янгьы омюр кьуралар. Муёллиф кьараманларыны бахтлы-сеадетли косьтермеге арз эте. Лякин акьикьатта комендатларнынъ даимий незарети алтында булунган, сой-акьрабаларынен корюшкени ичюн махкемеге чекильген, терлеме, сытма ве дигер хасталыкьлар нетиджесинде аман-аман ярысы гьайып олган миллет ялынъыз намуслы эмеги саесинде гьайып олмады. «Ишчилернинъ руху сагьлам, кьазанчы яхшы, олар озь кьолларынен озьлерине яшамакь ичюн эвлер кьуралар», - кьайд эте муёллиф. Бельки, тамам шу «сагьлам рух», ахлякьий темизлик халкькьа энъ агьыр, чыдалмаз дакьикьаларда бир-бирине ярдым кьолуны узатмагьа, севинччи де, кедерни де болюшмеге хызмет эткендир?

Муёллиф эсерге кирсетильген кьараманларнынъ такьдирлери вастасынен ахлякьий кьыйметликлер акькьында сёз юрюте. Саф гоньюлли кьазах йигити Молдабайнынъ ве директорнынъ рефикьасы Катерина Мануйловнанынъ намус акькьында фикирлери чешит-чешит:

- Сизде бу меселеге башкьаджа бакьыла, Молдабай.
- Намус ичюн сизде-бизде деген шей ёкь. Намус эр кес ичюн бир [4, с.132].

Эким Антонина Алексеевна Айриенинъ табиаты ве гузеллигинден айранда кьала, лякин онынъ

«эвелькининъ дженюп къадынлары киби» лаф эткенини къайд эте: «Сенинъ бир буюк эксиклигинъ бар, о да шу ки, сенде ачыкълыкъ етишмей. Озюнъни тар къафес ичинде тутасынъ. Джанынъ агъырмасын, бойле къадынларны шимди эркеклер чокъ бегенмейлер», - дей [4, с.99].

Эльбетте, инсанларнынъ талийлерини бир-бирине ошамагъан киби, севги, урьмет акъкъында тасавурлары да чешит-чешит. «Адамны урьмет этмек баш меселе. Урьметнинъ артындан севги келе билер. Амма севгининъ артындан урьмет эр вакъыт келе бильмез», - дей Айрие [4, с.83]. Яшайыш ойле ки, инсан даима эйиликке, видждан паклигине ынтыла, лякин алчакълыкъ, гъарезлик кимлернинъдир юрегинде энди ерсиреген. Инсан юрегиндеки тююмлерини чезмеге тырыша, лякин мунафыкълыкъ онынъ рухуны корюльмез къыршавларнен сыкъа. «Мунафыкълыкънен халкъ огърашмай, айны адамлар оны зенаат этип юре де халкънынъ адыны кирлейлер. Дюнъяда ондан да буюк алчакълыкъ бармы?» - дей Арсланов [4, с.171].

Черкез-Али озюнинъ тюшонджелерини къараманларына ишана. Эсернинъ энъ шырныкълы саифелери Себиля ве Месюде къартанайларнынъ хатырламаларынен багълы. Халкънынъ битмез-тюкенмез иджат ирмакъларында ырыз-намус, аиле, бала тербиеси, адетлеримиз акъкъында икметли фикирлер бар. «Акъайнынъ чарыкънен кетиргени, балам, къадыннынъ маджарнен ташыгъанындан хайырлыдыр. Эвде бир джарты акъайынъ олса, юрегинъ эр вакъыт ат башы киби турар», - дей Себиля къартанай. «Эв сыры, эвде къалмакъ керек. Сыр сакъламагъа бильмеген адам ич бир вакъыт севип оламаз, эм ойле аиленинъ оджагъы тез сёнер» [4, с.164].

Аджайип этнографик левхалар, Къырым акъкъында хатырламалар, шубесиз, гъурбет ильде окъуйдыжыгъа ватан иле рухий багъны ис этмеге имкян бергендирлер: «койнинъ этрафындаки «Шейтан дере», «Авдарыл къая», «Къыркъ огюз» деген ерлер. «Къаве бизлер ичюн пек характерли. Къаве дегирмени, джезвеси олмагъан сийректир. Меним анам дженк фелякетинде де джезвесини унутмагъан», - дей Самедин Арсланов.

Романда аталар сёзлери ве афоризмлернинъ сайысы чокъ. Оларда халкънынъ зекавети, онынъ аяткъа, алемге фельсефий, ахлякий-эстетик бакъышлары, арзу-умютлери ифаде олунгъан: «Яхшылыкъ яп да, денъизге ат. Япкъан эйлигинъ бир кунъ илле алдынъа чыкъар»; «Алманынъ эйсини къурт еген»; «Атны эт яраштырар, инсанны урба»; «Акъылсыз къуюгъа бир таш ата да, къыркъ акъыллы чыкъарамай» ве иляхре.

Черкез-Али «эмекте догъгъан интернациональ достлукъны» гъает самимиетликнен ве сьджакълыкънен тасвирлей. Чешит миллет векиллери Къазахстан чёллерини менимсейлер. Умумий иш, умумий ярдым, умумий къуванч ве къасеветлер эсер къараманларыны бир-бирине багълайлар. Айрие ве Самединнинъ ниях акъшамында миллетлерара мунасебетлер ачыкъ-айдын косътериле. Къазах яшлары хорнен йырлайлар:

«Айттым салом, Къаламкъас,
Сагъан къурбан малмен бас.
Сагъынгъанман сени ойлап,
Келер козьге ыстыкъ джас... [4, с.196]
Уйгъур яшынынъ йыры:

«Асмандаки ай болуп,

Джеми алемни тенъ коръсем.
Пияланъда чай болуп
Леблеринъни куйдирсем...»

Къырымтатар къарты эр кеснинъ дикъкъатыны джелъп эте:

«Селям версем, селям алмаз,
Селямларым тутсын сени.
Бени ич де сезмез олдынъ,
Гуналарым ютсын сени...» [4, с.197]

Эйилик ве кемлик, гузеллик ве бешаретлик даима яп-янаша мевджут олгъанлары киби, эсернинъ мусбет ве менфий къараманлары да даимий тартышмадала. «Ичинде зеэрли йыланлар ойнагъан ошекчи» Зера, «агъач саткъан» инженер Матвей Петрович, Айриенинъ арзу-умютлерини бербат эткен, ашаа адам Алиман Шахардин... Биз бу къараманнен романнынъ ильк саифелеринде ве эпилогында расткелишемиз. Муэллиф, занымызджа, Алиманнынъ къарарсыз алчакълыгыны (Айриенинъ эвинде, онынъ козьлери огюнде Марина Ласточкинанен ойнашкъаныны) тасвирлевде акъикъаттан узакълаша.

«Эки къальб бир олмаса, ят ашагъы оль. Мен Алиманны озь къальбимнен, озь аршынымнен ольчедим», - дей Айрие. Бир вакъытлары ат ойнаткъан Алиман Шахардин он алты йылдан сонъ хаста, янъгъыз, аджыныкълы бир алда бошуна кеткен омрюне языкъсынып: «Айрие, сен ич денъишмегенсинъ. Кене шу козьлер, кене шу кирпиклер. Мен сени бутон омюрим хатырлайджам. Къабаат озюмде экен...» - дей [4, с.347]. Бу «титис чырайлы даа бир бешарет алгъа» кельген адам. О «эски тонуны устуне ташлай, якъасыны котере, къалпагынынъ къулакъларыны ашагъы тюшюре...» Гуя эски гунахлары агъыр юк киби оны башындан ашагъы басалар, раатсыз этелер, бельки бу себептен «бу адам даима ушюп-къалтырап тургъангъа бенъзей». «Сокъакъта кимсе ёкъ. О бир озю кете. «Озюнънен берабер сувукъ да кетиргенсинъ», - дей Айрие Алимангъа [4, с.347]. Белли ки, тышкъы гузелликнинъ менбаалары – бу сафгонъюллик, инсаниетлик, эйи хызметлер. Ве, аксине, рухийсизлик, лякъайтлыкъ, бильхасса, ахлякъсыз арекетлер инсанны тышкъы корюнишини бербат этелер. Бу сувукъ, факъат озюнинъ аманлыгъы

акъкында тыюнонган инсаннынъ джезасы яныгызлыкъта.

«Икметли терек – къарагъач» акъкында эфсане эсернинъ гъаевий манасыны анъламагъа хызмет эте. Бедий джеэттен мезкюр эфсане гъает ифадели олмаса да, маневий эмиети буюктир: Биревни хор-факъыр эткен, озю де яшайшыны хор-факъырлыкъта кечире. Аджджыгъа татлы берильмез.

«Эдип мевзу сечип алмагъа, оны косътермеге, къараманларнынъ характерлерини айдынлатувда адий омюр тарзынынъ чизгилери черчивесинде иш коръмеге биле. Лякин эсерлеринде къараманларнынъ сайысы чокълугъы себебинден баш къараманларгъа алякъасы олмагъан вакъиаларгъа занымызджа чокъ ер бериле. Бу ал персонажларнынъ озьлерине хас чизгилерини даа ачыкъ тасвирлемеге кедер этмей къалмай» [8, с.444]. Андрей Каштановнен Катерина Мануйловнанынъ дженкявер яшлыкълары акъкында хатырламалары, айле анълашылмамазлыкълары, Матвей Петрович, Валерий ве онынъ аналыгъынен мунасебетлер, занымызджа, баш къараманларнынъ такъдирлеринен алякъадар дегиллер.

Мубарек Къзахстан сахраларында сюрюн олунгъан ватандашларыны гъает хошнот, бахытлы коръмек арзусында олгъан муэллиф, Самедин Арслановны совхознынъ уйкен агрономы япа, Айриени гъайретли иши ичюн шан-шурет тахтасына ляйыкъ эте. Намуслы Макъпуленинъ де козьлеринде севинч парылдады: элял эмеги ичюн совхоз реберлери оны Москвагъа ёллайлар. О Лениннинъ дюрбесини зиярет эте, дайни коре.

Дургъунлыкъ девринде яратылгъан эсерлер акъкында чешит, бир-бирине зыт фикирлер мевджут. Кимдир: «Тувгъан топрагъында тамыры олмагъан, сунбий суретте яратылгъан эсерлернинъ эксериети джансыз, олю догъгъан киби эдилер», – дей [9, с.4]. Базылары исе: «О китаплар ойледже кимсенинъ юрегинде из къалдырмадылар, халкъ ойле эсерлерни деерлик бильмей», – дей [9, с.5]. Лякин бундан отуз йыл эвельси, яратылгъан «Сабалар къучагъында» романнынъ мувафакъиетли тарафларыны да къайд этмек керек. Биринджиден, эсернинъ зенгин, ифадели тили. Экинджиден, халкъымызнынъ озюне хас миллий чизгилери тасвирленген.

Хаинликте къабаатлангъан миллет хырсызлыкъ, ичкиджилик, тенбеллик, ёлбасарлыкъ киби яман адетлерге къапылмай. Олюмден халесини гъайретли, намуслы эмекте тапа. Ахлякый сафлыгъы, эдалы арекетлери нетиджесинде дигер миллет векиллери арасында итибарлы ер ала.

Хуляса: Демек, Черкез-Алининъ «Сабалар къучагъында» романында ахлякый идеал – бу итаатлы, исьянджылыкъкъа джуръат этмеген адий инсан. О гъает къыйын, чыдалмаз алларда намуслы эмегинен умумхалкъ ишине озь иссесини къоша, онынъ иджадий къабилиетлери екъяне интернациональ айледе, рус халкъынынъ буюк къардашлыкъ ярдымынен ачыла.

Къулланылгъан эдебият

1. Шемъи-заде Э. Эдебий ве тенкъидий макъалелер. Симферополь, 2000.
2. Шемъи-заде Э. Эдебий ве тенкъидий макъалелер. Симферополь, 2000.
3. Азизов Д.Л. Бедий талиль принципери. //«Йылдыз», 1990. - №2. – с. 122-126.
4. Черкез-Али. Сабалар къучагъында. – Ташкент: Издательство Г. Гуляма, 1973.
5. «Голос Крыма» №19, 2003.
6. Гъайырдан къурув ве эдебият. //«Йылдыз», 1988. - №2. с.3-5.
7. Азизов Д.Л. Бедий талиль принципери. //«Йылдыз», 1990.- №2. с.122-126.
8. Кырымтатар эдебият тарихы. Акъмесджит, 2001. – с.444.
9. Биз озь Ватанымыздамыз.//«Йылдыз», 1997.- №3. – с.3-9.

УДК: 82-95

The article analyses problems of moral ideals evolution in the works of Cherkez-Ali.

Ахлякый, сафлыкъ, халкъ къальбининъ зенгинлиги, мунафыкълыкъ, инсанперверлик, эйилик.